



Broj: 01-50-1-15-45/04.
Sarajevo, 12. oktobra 2004.

ZAPISNIK

45. sjednice Predstavničkog doma Parlamentarne skupštine Bosne i Hercegovine,
održane 12. oktobra 2004. godine

Sjednica je počela u 10,10 sati. Prisustvovalo je 38 poslanika. Opravdano su odsustvovali: Izet Hadžić, Ruža Sopta, Mehmed Suljkanović, Zlatko Lagumdžija, Miloš Jovanović i Munib Jusufović.

Iz Vijeća ministara prisustvovali su ministri: Branko Dokić, Dragan Doko i Ljerka Marić, te zamjenik ministra Jusuf Kumalić. Sjednici je prisustvovalo i predstavnik Ombudsmena za ljudska prava BiH Mariofil Ljubić.

U ime OHR-a sjednicu je pratila Maja Ribar, a u ime Međunarodnog komiteta Crvenog križa Neda Dojčinović i Jasmina Kurbajić.

Predsjedavajući Doma Martin Raguž dao je uvodne napomene u vezi s prijedlogom dnevnog reda, upoznavajući tom prilikom poslanike o dopunama koje su usaglašene na sjednici Proširenog kolegija.

O prijedlogu dnevnog reda nije bilo rasprave, pa je predsjedavajući konstatirao da 45. sjednica ima sljedeći

DNEVNI RED

1. Zapisnici 43. i 44. sjednice Predstavničkog doma,
2. Potvrđivanje imenovanja zamjenika ministra vanjske trgovine i ekonomskih odnosa,
3. Poslanička pitanja i odgovori,
4. Izvještaj Komisije Kolegija o nastojanju za postizanje sporazuma o Prijedlogu zakona o izmjeni Krivičnog zakona Bosne i Hercegovine (predlagač poslanik Selim Bešliagić – zakon u prvom čitanju),
5. Izvještaj Komisije Kolegija o nastojanju za postizanje sporazuma o Prijedlogu zakona o Auto-moto savezu Bosne i Hercegovine (predlagač poslanik Momčilo Novaković – zakon u prvom čitanju),
6. Izvještaj Komisije Kolegija o nastojanju za postizanje sporazuma o prijedlogu zaključka da nadležna komisija sačini novi izvještaj o Prijedlogu zakona o plaćama i naknadama nosilaca sudske i tužilačke dužnosti i državnih službenika i zaposlenika u Sudu i Tužilaštvu Bosne i Hercegovine,
7. Zahtjev poslanika Milorada Živkovića za razmatranje Prijedloga zakona o popisu stanovništva, domaćinstava, stanova i poljoprivrednih gazdnistava u 2005. godini po hitnom postupku, u skladu s članom 104. Poslovnika,
8. Prijedlog zakona o Javnom radiotelevizijskom sistemu Bosne i Hercegovine (drugo čitanje),
9. Prijedlog zakona o Javnom radiotelevizijskom servisu Bosne i Hercegovine (drugo čitanje),
10. Prijedlog zakona o carinskoj politici Bosne i Hercegovine (drugo čitanje) – Zakon broj: 01,02-2-70/04 od 29.7.2004. godine,
11. Prijedlog zakona o Državnoj graničnoj službi (drugo čitanje),
12. Prijedlog zakona o nadzoru i kontroli prelaska državne granice (prvo čitanje),
13. Prijedlog zakona o uplatama na jedinstven i račun i raspodjeli prihoda (prvo čitanje),
14. Prijedlog zakona o finansiranju institucija BiH (prvo čitanje),
15. Izvještaj Zajedničke komisije o nastojanju za postizanje sporazuma o istovjetnom tekstu:
 - a) Zakona o sjemenu i sadnom materijalu poljoprivrednih biljaka BiH,
 - b) Zakona o izmjenama i dopunama Zakona o putnim ispravama BiH,
 - c) Zakona o Društvu Crvenog krsta/križa BiH,
 - d) Zakona o nestalim osobama u BiH,

16. Informacija Vijeća ministara Bosne i Hercegovine o unutrašnjoj zaduženosti,
17. Specijalni izvještaj Ombudsmena za ljudska prava Bosne i Hercegovine o pitanjima registracije birača radi ostvarenja aktivnog biračkog prava i o ostvarenju pasivnog biračkog prava nacionalnih manjina u Bosni i Hercegovini na Općinskim izborima 2004. godine,
18. Prijedlog odluke o poslaničkom mandatu Munibu Jusufoviću, poslaniku u Predstavničkom domu Parlamentarne skupštine Bosne i Hercegovine.

Ad – 1: Zapisnici 43. i 44. sjednice Predstavničkog doma

O zapisnicima nije bilo rasprave.

Dom je jednoglasno usvojio zapisnike 43. i 44. sjednice.

Ad – 2: Potvrđivanje imenovanja zamjenika ministra vanjske trgovine i ekonomskih odnosa

Predsjedavajući Doma pročitao je Odluku kojom je predsjedavajući Vijeća ministara imenovao Slobodana Ećimovića za zamjenika ministra vanjske trgovine i ekonomskih odnosa.

U okviru ove tačke nije bilo rasprave, pa se Dom izjasnio o odobrenju imenovanja.

Za odobrenje glasalo je 16, protiv 5, uzdržalo se 9 poslanika. Po entitetima, iz Federacije za je glasalo 12, iz Republike Srpske 3 poslanika.

Predsjedavajući je konstatirao da Odluka predsjedavajućeg Vijeća ministara nije dobila entitetsku većinu iz Republike Srpske, te da će se provesti postupak usaglašavanja u Komisiji Kolegija, u skladu sa Poslovníkom Doma.

Ad – 3: Poslanička pitanja i odgovori

Predsjedavajući Raguž podsjetio je poslanike na koja su pitanja dostavljeni odgovori.

Odgovore na pitanja komentirali su: Selim Bešliagić, Milorad Živković, Petar Kunić, Mirsad Ćeman, Ljiljana Milićević, Momčilo Novaković i Adem Huskić. Većina poslanika nije bila zadovoljna dobivenim odgovorima, a odgovore su ponovo zatražili Selim Bešliagić, Petar Kunić, Ljiljana Milićević i Mirsad Ćeman.

Nova poslanička pitanja postavljena su kako slijedi:

Nikola Špirić:

«Neposredno pred godišnje odmomore donijeli smo odluku o promjeni carinskih tarifa i rečeno je da će resorno ministarstvo u roku od tri mjeseca informirati javnost i Parlament koliko su te promjene carinskih tarifa bile u interesu mesoprodućavaća, a koliko u interesu mesopreradivaća...»

Postavljam pitanje – na osnovu kojih zaključaka i odluka je Vijeće ministara dozvolilo uvoz mesa i mesnih prerađevina iz tarifnih oznaka 0202309000, zatim 0203191500 ili 0207141020, zatim 0210113100 i 0210198100? A činjenica je da se uvozi preko prijelaza Raća i prijelaza Gradiška. A način na koji se uvozi je direktno protiv domaće proizvodnje i domaćih proizvođaća...»

Mirsad Ćeman:

«1. Svojevremeno je postignut sporazum o balansu vojnih efektiva na području Bosne i Hercegovine i susjednih zemalja (Republike Hrvatske i Srbije i Crne Gore) – ovo nije oficijelni naziv sporazuma. Pitanje:

Kako se provodi ovaj sporazum, ko ga nadgleda i da li su Predsjedništvo BiH i drugi organi BiH (PSBiH, koliko ja znam, nije) o tome informirani, odnosno raspravljali, te kakvi su stavovi o tom pitanju zauzeti? Tražim pisani odgovor od Predsjedništva BiH ili drugog organa – Vijeća ministara, odnosno Ministarstva odbrane.

2. Šta je istina o falsifikatima u CIPS projektu (mislim na nedavna pisanja u medijima) i molim aktuelne podatke o realizaciji projekta (lične karte, vozačke dozvole itd.)? Tražim pisani odgovor od Ministarstva za civilne poslove.»

Jozo Križanović:

«Na 34. sjednici Predstavničkog doma PSBiH, održanoj 23.4.2004., pod tač. 3. dnevnog reda, raspravljajući o privremenom izvještaju Ustavno-pravne komisije, kao nadležne komisije o Prijedlogu okvirnog zakona o restituciji, Predstavnički dom donio je dva znaćana zaključka koja nisu realizirana (citirao

zaključke). Ovo je još jedan od primjera kako se izvršavaju zaključci Predstavničkog doma. Rokovi su poodavno prošli.

Pitam Kolegij Predstavničkog doma: Hoće li se i šta preduzeti da se ovi zaključci realiziraju?»

Muhamed Moranjkić:

1. «Svima u ovoj zemlji je poznato – i to je **javna tajna**, da se ne može dobiti rješenje za penziju, ni u FBiH ni u RS, bez obzira na uslove i stanje osobe – pacijenta) **bez mita** koje se kreće od 3000 KM do 7.000 KM. To je dobro organizirana mafija koja djeluje pod okriljem ili državnih institucija ili organa, ili javnih ustanova. Pitanje:

Hoće li neko u ovoj državi stati tome na kraj – i kada, i ko je institucionalno zadužen za rješavanje ovih problema?»

2. «Opet u posljednje vrijeme – agresivno, putem medija pojavljuje se reklama da koridor 5c gradi «Bosmal» Pitanje:

Da li je ta reklama tačna i ako jeste:

- a) Kad je raspisan tender i pod kojim uslovima, a ako nije:
- b) Ko i na koji način plasira ove neistine?

Tražim, kao zaključak, da se za sljedeću sjednicu pripremi informacija o svim aktivnostima na pripremi izgradnje ovog koridora – šta se do sada uradilo i dokle se stiglo?»

Milorad Živković:

1. «Da li je određen tačan termin odlaska deminerske jedinice BiH u Irak? (Pitanje Ministarstvu odbrane)
2. Kada će Republika Hrvatska uplatiti BiH sredstva (preko 100 miliona KM) zarađena po osnovu tranzita struje kroz bh. elektromrežu»? (Pitanje Ministarstvu saobraćaja i komunikacija)

Ivo Miro Jović:

«1. Pitanje ministru unutarnjih poslova Tuzlanskog kantona: Prije 10 dana usred dana na ulicama Tuzle pretukli su petorica mladića bošnjačke nacionalnosti don Marka Lacića, župnika, policija je pomogla svojim činjenjem i nečinjenjem teroristima. Šta je preduzeo protiv počinilaca i kad će prosljediti predmet Tužilaštvu?

2. U općini Lukavac u posljednjih nekoliko godina dogodilo se ubistvo i silovanje šest žena hrvatske nacionalnosti i nijedan slučaj nije razriješen niti procesuiran, a žrtve koje su ostale žive svakodnevno doživljavaju stravične traume jer zlikovci prolaze pored njih?».

3. Tužilaštvu BiH: Kada će podnijeti tužbu ili krivičnu prijavu protiv generala Klajna koji je više puta u medijima izjavio kako on zna ubicu pokojnog ministra Joze Leutara. Prošlo je više godina od tog terorističkog čina, vrijeme je reći istinu. Inače je ružna poruka stanovništvu BiH od međunarodnih pojedinaca i institucija?»

Filip Andrić:

«Pitanje Ministarstvu pravde i Ministarstvu sigurnosti: Hoće li se i kada očitovati ministarstva u vezi s izvještajem Komisije Predstavničkog doma PS vezano za zakonitost hapšenja Ante Jelavića, Miroslava Prce i Miroslava Rupčića?

Kolegiju Doma. " Od vas tražim da zatražite od Ministarstva sigurnosti i Ministarstva pravde da se konačno očituju u vezi s izvještajem Komisije ovog doma vezano za zakonitost hapšenja Ante Jelavića, Miroslava Prce i Miroslava Rupčića».

Vinko Zorić:

1. Kolegiju Predstavničkog doma pitanje: Kada ću početi dobivati poslaničke materijale na hrvatskom jeziku? Napomena: Nijedan materijal nisam dobio na hrvatskom jeziku, a često dobijem materijale na engleskom. Pitam se da li je na sceni kolonizacija Bosne i Hercegovine.

2. Ministarstvu saobraćaja i komunikacija (Vijeću ministara): Šta je sa izgradnjom autoputeva kroz Bosnu i Hercegovinu? Ko donosi odluku o putnim pravcima i početku izgradnje? Ko je nadležan za autoputeve, institucije BiH ili entiteti? Ko gradi autoput Sarajevo-Zenica i uklapa li se on u koridor 5c? Kako se može dogoditi da na magistralnom putu Široki Brijeg – Mostar imamo stalni saobraćajni znak ograničenja brzine na 20 km/h u dužini od 2 km u nenaseljenom području?

3. Vijeću ministara pitanje: Kada će i hoće li u parlamentarnu proceduru doći Zakon o sportu?

Ad – 4: Izvještaj Komisije Kolegija o nastojanju za postizanje sporazuma o Prijedlogu zakona o izmjeni Krivičnog zakona Bosne i Hercegovine (predlagač poslanik Selim Bešliagić – zakon u prvom čitanju)

Predsjedavajući Doma podsjetio je da je u Komisiji Kolegija postignuta saglasnost o Prijedlogu zakona o izmjeni Krivičnog zakona i da je time Prijedlog zakona usvojen u prvom čitanju. Zatim je na glasanje dao prijedlog da se Prijedlog zakona razmatra u drugom čitanju.

Za prijedlog su glasala 22 poslanika, jedan je glasao protiv, a tri su se uzdržala, ali nije bilo entitetske većine. Odmah je provedeno usaglašavanje u Komisiji Kolegija, nakon čega je predsjedavajući izvijestio Dom da je Kolegij saglasan da se o Prijedlogu zakona raspravlja u drugom čitanju.

Selim Bešliagić je ukratko obrazložio Prijedlog zakona i saglasio se s dopunama koje je usvojila nadležna komisija.

U raspravi o Prijedlogu zakona učestvovali su: Vinko Zorić, Momčilo Novaković, Petar Kunić i Selim Bešliagić.

Poslije rasprave, izvršeno je glasanje. Za su glasala 23, protiv 8 – iz Federacije za je glasalo 20, iz RS 3.

Predsjedavajući je konstatirao da Prijedlog zakona o izmjeni KZ nije dobio entitetsku većinu i da će se provesti postupak usaglašavanja, u skladu s Poslovníkom Doma.

Ad – 5: Izvještaj Komisije Kolegija o nastojanju za postizanje sporazuma o Prijedlogu zakona o Auto-moto savezu Bosne i Hercegovine (predlagač poslanik Momčilo Novaković – zakon u prvom čitanju)

Predsjedavajući je konstatirao da u Komisiji Kolegija nije postignuta saglasnost o Prijedlogu zakona u prvom čitanju, pa je proveo drugi krug glasanja, kojom prilikom je za Prijedlog zakona glasalo 12, a protiv 15 poslanika. Predsjedavajući je konstatirao da Prijedlog zakona o Auto-moto savezu BiH nije usvojen u prvom čitanju.

Ad – 6: Izvještaj Komisije Kolegija o nastojanju za postizanje sporazuma o prijedlogu zaključka da nadležna komisija sačini novi izvještaj o Prijedlogu zakona o plaćama i naknadama nosilaca sudske i tužilačke dužnosti i državnih službenika i zaposlenika u Sudu i Tužilaštvu Bosne i Hercegovine

Predsjedavajući je konstatirao da ni o prijedlogu zaključka nije postignuta saglasnost u Komisiji Kolegija, pa je prijedlog zaključka dao na glasanje u drugom krugu. Za je glasalo 16, protiv 16, uzdržao se jedan poslanik. Prema tome, predloženi zaključak nije dobio većinu u Domu.

Zatim se Dom izjasnio o Prijedlogu zakona u prvom čitanju. Za je glasalo 6, protiv 22, uzdržalo se 5 poslanika.

Predsjedavajući je konstatirao da Prijedlog zakona o plaćama i naknadama nosilaca sudske i tužilačke dužnosti i državnih službenika i zaposlenika u Sudu i Tužilaštvu Bosne i Hercegovine nije usvojen u Predstavničkom domu.

Ad – 7: Zahtjev poslanika Milorada Živkovića za razmatranje Prijedloga zakona o popisu stanovništva, domaćinstava, stanova i poljoprivrednih gazdnistava u 2005. godini po hitnom postupku, u skladu s članom 104. Poslovníka

Predlagač Milorad Živković podnio je Domu obrazloženje zahtjeva za hitni postupak.

U okviru ove tačke vođena je duža rasprava u kojoj su učestvovali: Seada Palavrić, Selim Bešliagić, Mladen Potočnik, Sead Avdić, Momčilo Novaković, Mara Perkanović, Vinko Zorić, Tihomir Gligorić, Nikola Špirić, Beriz Belkić, Ljiljana Milićević, Jelina Đurković i Milorad Živković.

Poslije rasprave predsjedavajući je zahtjev dao na glasanje. Za je glasalo 16, protiv 15, uzdržala se 3 poslanika. Po entitetima, iz Federacije BiH za je glasalo 5, a iz RS 11.

Predsjedavajući je konstatirao da zahtjev nije dobio entitetsku većinu i da će se provesti postupak usaglašavanja.

Ad – 8: Prijedlog zakona o Javnom radiotelevizijskom sistemu Bosne i Hercegovine (drugo čitanje)

Poslije uvodnih napomena predsjedavajućeg Doma, o Prijedlogu zakona vođena je duža rasprava u kojoj su učestvovali: Momčilo Novaković, Seada Palavrić, Filip Andrić, Ljiljana Milićević, Vinko Zorić, Tihomir Gligorić, Selim Bešlić i Azra Hadžiahmetović. Nakon rasprave govorio je ministar Brnako Dokić.

Nakon izlaganja ministra Dokića predsjedavajući je konstatirao da su Selim Bešlić i Nenad Mišić povukli amandmane na amandman Komisije. Zatim je na glasanje dao amandmane Seade Palavrić – jedan kojim osporava amandman Komisije i šest amandmana koje ponovo brani u plenarnoj fazi.

Nijedan amandman nije usvojen.

Pošto je obavljeno glasanje o amandmanima, Klub SDA zatražio je pauzu, nakon koje je izvršeno glasanje o Prijedlogu zakona o Javnom radiotelevizijskom sistemu. Za Prijedlog zakona glasalo je 11, a protiv 13 poslanika.

Predsjedavajući je konstatirao da Prijedlog zakona o Javnom RTV sistemu nije usvojen u Predstavničkom domu.

Ad – 9: Prijedlog zakona o Javnom radiotelevizijskom servisu Bosne i Hercegovine (drugo čitanje)

U okviru ove tačke diskutirali su: Nikola Špirić, Momčilo Novaković, Petar Kunić, Filip Andrić, Seada Palavrić, Vinko Zorić, Nijaz Duraković, Ivo Miro Jović i Azra Hadžiahmetović.

Poslije diskusije predsjedavajući je konstatirao da su u proceduri amandmani Filipa Andrića i Seade Palavrić, koje ponovo brane u plenarnoj fazi, kao i amandmani Azre Hadžiahmetović, koje je podnijela pozivom na član 94. stav 3. Poslovnika. Zatim je amandmane dao na glasanje.

Amandmani Filipa Andrića i Seade Palavrić nisu usvojeni.

Amandman 1. Azre Hadžiahmetović dobio je većinu prisutnih, ali ne i entitetsku, pa je odmah provedeno usaglašavanje u Komisiji Kolegija. Nakon što je u Komisiji Kolegija postignuta saglasnost, izvršeno je glasanje o amandmanu 1. u drugom krugu, kojom prilikom je iz Republike Srpske protiv glasalo 11 poslanika, što je više od 2/3 iz entiteta. Prema tome, amandman 1. nije usvojen.

Također nije usvojen ni 2. amandman Azre Hadžiahmetović – nije dobio većinu prisutnih.

Poslije glasanja o amandmanima, pošto nije usvojen amandman Filipa Andrića, Vinko Zorić izvijestio je Dom da će Klub HDZ-Demokršćani za vrijeme glasanja o Prijedlogu zakona napustiti salu. Predsjedavajući Doma Martin Raguž također je izvijestio Dom da će i on sa svojim klubom na jedan minut napustiti salu.

Glasanje o Prijedlogu zakona proveo je prvi zamjenik predsjedavajućeg Šefik Džaferović.

Za Prijedlog zakona glasala su 24, protiv jedan, uzdržalo se pet poslanika. Po entitetima, iz Federacije za je glasalo 13, a iz Republike Srpske 11 poslanika.

Zamjenik predsjedavajućeg konstatirao je da je usvojen Zakon o Javnom radiotelevizijskom servisu. Zatim je dao pauzu od dvije minute kako bi se poslanici Kluba HDZ-Demokršćani vratili u salu.

Ad – 10: Prijedlog zakona o carinskoj politici Bosne i Hercegovine (drugo čitanje)

– Zakon broj: 01,02-2-70/04 od 29.7.2004. godine

Predsjedavajući Doma Martin Raguž iznio je uvodne napomene vezano za Izvještaj nadležne komisije.

U okviru ove tačke nije bilo rasprave.

Sa 22 glasa za i šest uzdržanih usvojen je Zakon o carinskoj politici Bosne i Hercegovine.

Ad – 11: Prijedlog zakona o Državnoj graničnoj službi (drugo čitanje)

U uvodnim napomenama predsjedavajući Doma kazao je da je Seada Palavrić podnijela dva amandmana – jedan kojim osporava amandman Komisije i jedan koji ponovo brani u plenarnoj fazi.

Nije bilo diskusije, pa je predsjedavajući proveo glasanje o amandmanima.

Amandman Seade Palavarić na amandman Komisije dobio je opću većinu, ali ne i entitetsku. Odmah je provedeno usaglašavanje u Komisiji Kolegija. Kako nije bilo saglasnosti, proveden je drugi krug glasanja.

Amandman nije usvojen jer je u drugom krugu glasanja protiv glasalo 2/3 iz entiteta – iz RS protiv glasalo 12 poslanika.

Ni drugi amandman Seade Palavrić nije usvojen – za glasalo 11, protiv 14, uzdržalo se 5 poslanika.

Poslije glasanja o amandmanima Dom je, sa 28 glasova za i 3 uzdržana /iz Federacije 17, iz RS 11/, usvojio Zakon o Državnoj graničnoj službi.

Ad – 12: Prijedlog zakona o nadzoru i kontroli prelaska državne granice (prvo čitanje)

U okviru ove tačke nije bilo rasprave.

Dom je sa 29 glasova za, jednim protiv i dva uzdržana usvojio Prijedlog zakona u prvom čitanju.

Također je usvojen Prijedlog predsjedavajućeg da se pređe u drugo čitanje.

Sa 28 glasova za i 4 uzdržana usvojen je Zakon o nadzoru i kontroli prelaska državne granice.

Ad – 13: Prijedlog zakona o uplatama na jedinstveni račun i raspodjeli prihoda (prvo čitanje)

I Prijedlog zakona o uplatama na jedinstveni račun i raspodjeli prihoda usvojen je i u prvom i u drugom čitanju. Za Zakon u drugom čitanju glasalo je 26 poslanika, pet poslanika se uzdržalo.

Ad – 14: Prijedlog zakona o finansiranju institucija BiH (prvo čitanje)

U okviru ove tačke dnevnog reda također nije bilo rasprave, pa je Prijedlog zakona usvojen i u prvom i u drugom čitanju. Za Zakon u drugom čitanju glasalo je 28, uzdržala su se četiri poslanika.

Ad – 15: Izvještaj Zajedničke komisije o nastojanju za postizanje sporazuma o istovjetnom tekstu:

- a) Zakon o sjemenu i sadnom materijalu poljoprivrednih biljaka BiH,
- b) Zakona o izmjenama i dopunama Zakona o putnim ispravama BiH,
- c) Zakona o Društvu Crvenog krsta/križa BiH,
- d) Zakona o nestalim osobama u BiH.

Predsjedavajući je konstatirao da su zajedničke komisije usaglasile sva četiri zakona iz ove tačke dnevnog reda, pa je izvještaje o usaglašavanju dao na glasanje.

Jednoglasno su usvojeni izvještaji zajedničkih komisija o usaglašavanju zakona iz podtački a), b), c) i d).

Ad – 16: Informacija Vijeća ministara Bosne i Hercegovine o unutrašnjoj zaduženosti

Zbog nedolaska predlagača, za 46. sjednicu odgođeno je razmatranje Informacije o unutrašnjoj zaduženosti.

Ad – 17: Specijalni izvještaj Ombudsmena za ljudska prava Bosne i Hercegovine o pitanjima registracije birača radi ostvarenja aktivnog biračkog prava i o ostvarenju pasivnog biračkog prava nacionalnih manjina u Bosni i Hercegovini na Općinskim izborima 2004. godine

U ime Ustavno-pravne komisije, povodom Specijalnog izvještaja, kratko je govorio predsjedavajući te komisije Mirsad Ćeman.

Poslije izlaganja Mirsada Ćemana, predsjedavajući je Specijalni izvještaj dao na glasanje, s dopunama koje je Ćeman iznio u ime Ustavno-pravne komisije.

Sa 26 glasova za i tri uzdržana usvojen je Specijalni izvještaj Ombudsmena za ljudska prava Bosne i Hercegovine o pitanjima registracije birača radi ostvarenja aktivnog biračkog prava i o ostvarenju pasivnog biračkog prava nacionalnih manjina u Bosni i Hercegovini na Općinskim izborima 2004. godine

Ad – 18: Prijedlog odluke o poslaničkom mandatu Munibu Jusufoviću, poslaniku
u Predstavničkom domu Parlamentarne skupštine Bosne i Hercegovine

Bez rasprave Dom je usvojio Odluku o uslovnom suspendiranju poslaničkog mandata Munibu Jusufoviću u Predstavničkom domu Parlamentarne skupštine Bosne i Hercegovine, do donošenja odluke Ustavnog suda povodom apelacije koju je Munib Jusufović podnio protiv presude Apelacionog suda Brčko Distrikta Bosne i Hercegovine. Za odluku glasalo je 27 poslanika, a dva poslanika su se uzdržala.

Ovim je realiziran dnevni red 45. sjednice.

Sjednica je završena u 16,15 sati.

Sastavni dio Zapisnika je transkript 45. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Martin Raguž